

17. august 2007  
26. januar 2007

UKA 2007/15  
UPA 2007/102

## Inatsisissatut siunnersuummut nassuiaatit

### Nassuiaatit nalinginnaasut

#### 1. Siunnersuummut tunngaviusut imarisaalu

Aalisarnermik piniarnermillu inuussutissarsiutillit inuussutissarsiornerannik siuarsaaneq pillugu Inatsisartut peqqussutaat atuuttoq naapertorlugu inuussutissarsiutigalugu umiatsiaaqqat nutaamik sanaat pissarsiarinerinut piumasaqaatit erseqqissumik oqaatigineqartut malillugit Naalakkersuisut tapiissuteqarsinnaapput. Inatsisartut peqqussutaata piumasaqaatit oqaatigisaasa ilagaat qinnuteqaateqartoq 18-it 60-illu akornanni ukioqassasoq.

Peqqussutissatut siunnersuutikkut ugguuna ukiorisat qummut killingat 65-inik ukiulinnut qaffanneqassaaq.

<b>§ 6 – maannakkut oqaasertalerneqarnera</b>	<b>§ 6 – oqaasertaasa allannguutissai</b>
<p>Qinnuteqartoq, inuussutissarsiutigalugu nutaamik umiatsiaarartaarniarnermini, § 5 malillugu imaassaaq:</p> <p>1) 18-it 60-illu akornanni ukioqassalluni, aamma</p> <p>2) tapiiffigineqarnissamik qinnuteqarnini ukiunik marlunnik sioqqullugu inuussutissarsiutigalugu piniartutut aalisartutulluunniit allagarserneqarsimasussaalluni qinnuteqarnermilu nalaani taama allagaqartaqartussaalluni.</p>	<p>Qinnuteqartoq, inuussutissarsiutigalugu nutaamik umiatsiaarartaarniarnermini, § 5 malillugu imaassaaq:</p> <p>1) 18-it 65-illu akornanni ukioqassalluni, aamma</p> <p>2) ) tapiiffigineqarnissamik qinnuteqarnini ukiunik marlunnik sioqqullugu inuussutissarsiutigalugu piniartutut aalisartutulluunniit allagarserneqarsimasussaalluni qinnuteqarnermilu nalaani taama allagaqartaqartussaalluni.</p>

Taamaalilluni inuussutissarsiutitut umiatsiaaqqanik pissarsinermi tapiissuteqarnissamut ukiorisat qummut killingat pensionisiaqalernermit nalinginnaasumik ukiorisanut naapertuuttun-ngortinneqarpoq –

naatsorsuutigineqarmammi pensionisiat pillugit iluarsartuusseqqissamut atatillugu taanna ukiunit 63-init 65-inut sivitsorneqassasoq.

Taamaalillutik piniartut pensionisiaqalersussat ukioqangajalersut inuussutissarsiortutut ukiulittut allatulli inuussutissarsiutigalugu umiatsiaaqqamik pissarsinissamut siunnersuutikkut tapiissutinik qinnuteqaateqarsinnaalissapput.

Piniartut utoqqalisut inuussutissarsiutigalugu umiatsiaaqqatik pisoqalillutik nungullarlutillu taarsertariaqalerpata pisortanit ikiorserneqarnissamut ikaarsaarnermikkut inuussutissarsiumminnik piumassuserinngisaminnik unitsitsinnginnissaannut siunnersuut iluaqutaasinnaassasoq neriutitigineqarpoq.

Inatsisartut peqqussutaannut atuuttumut tunngatillugu inatsimmut nassuiaatini inuussutissarsiutigalugu umiatsiaaraq ukiuni 12-ine atorineqarsinnaasoq Aalisarnermut Piniarnermullu Pisortaqaarfik missingiisimammat oqaatigineqassaaq. Siunnersuut matumani pineqartoq malillugu qinnuteqaateqartumut 61, 65-illu akornanni ukiulimmut inuussutissarsiutigalugu umiatsiaaqqamut Naalakkersuisut tapiissuteqarnerat pineqaraangat tapiissuteqarfigineqartup inuussutissarsiummik ingerlatsigallartutut ukiut atuuffigisassaatur naatsorsuutigisat qaangerujussuarlugit inuussutissarsiutigalugu umiatsiaaraq taamaalilluni atorineqarallartussaavoq.

Assersuutigaluguli tapiissutisisup pensionisiaqalernerani inuussutissarsiutigalugu umiatsiaaraq pissarsiarineqarnermi kingorna ukiut arfinillit qaangiutinngitsut tunineqarpat, Inatsisartut peqqussutaanni § 10, nr. 3, naapertorlugu, tapiissutit pissarsiarineqarnerannit ukiup aallartinneri tamaasa aqqaneq-marlorartermmik nalikillillugit tapiissutit tunniunneqartut Naalakkersuisut utertillugit akilerneqaqqusinnaavaat.

Tapiissutisisoq (ass. pensionisiaqalernermit ikaarsaarnep kingunerisaatur) ukiuni malittuni marlunni inuussutissarsiutigalugu piniartutut aalisartutulluunniit allagartaqanngippat, imaluunniit qaammatini kingullerni aqqaneq-marlunni inuussutissarsiutigalugu umiatsiaaqqamik atuinermigut isertitami amerlanersaannik pissarsisimasutut nalilerneqanngippat aamma tamanna atuutissaaq.

## 2. Pisortanut aningaasaqarniarnikkut allaffissornikkullu kinguneqaatissat

Inuussutissarsiutigalugu umiatsiaaqqamik pissarsinermut Naalakkersuisut tapiiffigisinnaasaat siunnersuut malillugu amerlissapput, tapiissutilli tunniunneqarnissaannut aningaasaqarniarnikkut killiliussanik allannguisuussanani. Siunnersuut taamaalilluni Namminersornerullutik Oqartussanut kinguneqaateqassanngilaq.

Inuussutissarsiutigalugu umiatsiaaqqamik pissarsinermut Naalakkersuisut tapiissuteqarfigisinnaasaasa amerlinissaat tapiissutinik qinnuteqaatinik amerleriartitsisinnaasoq naatsorsuutigineqarsinnaavoq, Inatsisartullu peqqussutaanni § 10 atuuttoq naapertorlugu tapiissutinik utertillugit akilersuinermit tunngatillugu suliaassat suliarineqartartut ataatsimut isigalugit amerleriassasut aamma immaq ilimagineqarsinnaalluni.

Allaffissornikkulli kinguneqaatissat annikitsuinnaassasut naliliisoqarpoq. Inatsisartut peqqussutaata allangortinneqarnissaanik siunnersuutip kingunerisaatut Aalisarnermut Piniarnermullu Pisortaqaarfimmi sulisorisat amerlineqaqqinnissaat pisariaqassasoq taamaalilluni naatsorsuutigineqanngilaq.

Siunnersuut kommuninut aningaasaqarniarnikkut allaffissornikkulluunniit kinguneqaateqassanngilaq.

### 3. Inuussutissarsiummik ingerlatsisunut aningaasaqarniarnikkut allaffissornikkullu kinguneqaatissat.

Inuussutissarsiutigalugu umiatsiaaqqanik pissarsinermut tapiissutinik qinnuteqaateqartunut ukiorisatigut qummut killiliussiaq 60-iniit 65-inut qaffanneqassaaq. Tamatuma saniatigut siunnersuut inuussutissarsiutinik ingerlatsisunut aningaasaqarniarnikkut allaffisornikkullu kinguneqaateqassasoq naatsorsuutigineqanngilaq.

### 4. Avatangiisinut pinngortitamullu kinguneqaatissat

Siunnersuut avatangiisinut pinngortitamullu kinguneqaateqateqassasoq naatsorsuutigineqanngilaq.

### 5. Innuttanut allaffissornikkut kinguneqaatissat

Siunnersuut innuttanut allaffissornikkut kinguneqaateqassanngilaq.

### 6. Naalagaaffeqatigiinnermut Namminersornermullu tunngasut

Siunnersuut Naalagaaffeqatigiinnermut namminersornermullu kinguneqaateqassanngilaq.

### 7. Pisortanut kattuffinnullu tusarniaanissaq

Siunnersuutip saqqummiunneqarnissaa sioqqullugu pisortanut kattuffinnullu il.il. tusarniaaneq ingerlanneqarsimanngilaq. Siunnersuutigineqassaaq siunnersuutip aappassaaneerneqarnissaa 2007-imi ukiakkut ataatsimiinnermut kinguartinneqassasoq, aammalu tamatuma tungaanut siunnersuutip aappassaaneerneqarnissaa sioqqullugu tusarniaanermut akissutigigineqartut Inatsisartut ataatsimiititaliaani suliaqarnermut ilaatinneqarsinnaaqullugit pisortat kattuffiillu il.il. tusarniaavissatut naleqquttut tusarniaavigeqqullugit Inatsisartut Naalakkersuisut qinnuigissagaat.

**Inatsisissatut siunnersuummi aalajangersakkanut ataasiakkaanut nassuiaatit**

Inuussutissarsiutigalugu umiatsiaaqqamik pissarsinermut tapiissutinik qinnuteqaateqarnissamut ukiorisanut qummut killigititaq 60-iniit 65-inik ukioqarnermut qaffanneqarnissaa aalajangersakkap kingunerissavaa.

Qinnuteqaateqarnerup nalaani ukiorisassanik piunasaqaat eqquutinneqarsimassaaq.

Inuussutissarsiutigalugu umiatsiaaqqap nutaatut sanaajunissaanik, minnerpaamik 16 foditut, anginerpaamillu 19 foditut takissuseqarnissaa, kiisalu Kalaallit Nunaanni inuussutissarsiutigalugu umiatsiaaqqatut atorneqarnissamut akuersissutigineqarsimasuunissaanik Inatsisartut peqqussutaata atuuttup piunasaqaatai atuutissapput. Aammattaaq qinnuteqaateqartoq piffissami qinnuteqaateqarnermi nalaani kiisalu tamatuma siorna inuussutissarsiutigalugu piniartutut inuussutissarsiutigaluguluunniit aalisartutut allagartaqarnissaanik piunasaqaat atuutissaaq.

Taamatutaaq tapiissuteqarnissamut Inatsisartut peqqussutaanni § 3-mi pingaarnertut tunngavissaatitaasut atuutiinnassapput, aamma tapiissutisisinnaatitaasut amerlineqarnerannut tunngatillugu.

#### *§ 2-mut*

Inatsisartut peqqussutaat ull. 1. januar 2008 atuutilissasoq siunnersuutigineqarpoq.

Peqqussutissatut siunnersuutip aappassaaneerseqarnissaa 2007-imi ukiakkut ataatsimiinnermut kinguartinneqassasoq siunnersuutigineqarmat tusarniaanerit kinguneqaatissanillu naliliinerit tamatuma tungaanut nalilersorneqarnissaat atuutilerfissatut piffissaliussap toqqarneqarneranut attuumassuteqarpoq.